



Das ist ein anschlag eins zugs wider die  
Turgken. Vnd alle die wider den Chri-  
stenlichen glauben seind.





## Diser anschlag wider die Turgkenn ist

aufgezogen auß der verwilligung der mindern brüder oder Barfusser den sie gethan vnd zugesagt haben vnserm heyligen vater dem Babst/ wie sie haben viertzig tausent Clöster/ wölten sie auß yedem Closter eyn geraden iungen münich dar geben/ Das in ließ vnser heyliger vater der Babst nach viertausent Clöster/ das es belib auff. xxxvi. tausent / Auß yedem eyn münich. das berecht. xxxvi. tausent münich.

¶ Auch mit der vorwilligung/ sie wölten nit wider heym kummen/ dan fur vnd fur yren orden meren in den landen gegen den Türcken.

¶ Tun setz ich/ das die andern drey Orden/ als Prediger/ Augustiner/ Carmeliten/ auch zu hauffen haben. xxxvi. tausent Clöster.

¶ Tun setz ich/ das alle andere Clöster/ der dā vil ist/ als Teitsch hern Johansiter/ Bernhardiner/ Benedicter/ Carthaiser/ Schotten/ Pauliner/ vil ander Orden/ auch das sie zuhauff haben. xxxvi. tausent Clöster.

¶ Tun setz ich alle Stiffte/ Frawen vnnnd iunctfrawen Clöster/ auch auff. xxxvi. tausent Stiffte vnd Clöster.

¶ Wen ydes Closter eyn man solt geben/ brecht die Summ hunderth tausent vnd vier vnd vierzig tausent man.

¶ Tun setz ich/ also menig minder brüder orden ist/ das dar geben sey/ Also manig Closter/ also oft zehen Pfarr Kirchen/ das brecht drey mall hundert tausent vnnnd sechzig tausent Pfarr Kirchen / wen yede Pfarr Kirch solt eyn man geben/ eyne der andern zuhilff/ brecht drey mall hundert tausent vnd sechzig tausent man.

¶ Summa summarū fünffmall hundert tausent vñ vier tausent man.

¶ Item/ Tun wil ich setzen wie wir dem Türcken ein widerstandt theten mit volck/ das zu streyten tüglic/ genaygt vñ gewont ist der Kriegß leuff/ vnnnd zu weid ligen/ Ein yeder man/ arm vnnnd reych/ on groß beschwernus seines leybs vnd guts/ Das in der Chulstenheyt eyn gleyche püßd getragen möcht werden/ in geystlichen vñ weltlichen stenden auff verbesserung böser vnterweysung.

¶ Item/ Tun setz ich fur das erst die Clöster/ das eyn yedes Closter hat xxx. person/ geystlich vnd weltlich/ die dan zu dem heyligen Sacrament geend/ das yede person all wochen eyn pfenning solt geben/ wer yedem Closter alle wochen. xxx. pfenning/ oder ein halb ort eines Reinishen gulden/ were allweg/ eynem Closter alle zehen wochen eyn Vngerischen



gulden/breche alle wochen die Clöster. xiiij. tausent. liij. hundert Ungerisch gulden. x. schilling für eyn gulden/macht eyn Jar sibemall hundert tausent. xlvij. tausent vnd achthundert Ungerisch gulden.

¶ Item/nun setz ich eyn pfarr in die andern zurechen/das sie hab drey hundert menschen/die zu dem heyligen Sacrament geen/dan der pfarr findt vil mer/gib ich alle zuhilff eyne der andern/Vn wen yedes mensch alle wochen ein pfenning gebe/das dan zu dem heyligē Sacrament geet macht eyn wochen drey mall hundert tausent. lx. tausent Ungerisch gulden/machte ein iar. viij. million. vij. hundert mal tausent vnd. xx. tausent Ungerisch gulden/ye. x. schilling pfenning für eyn Ungerischen gulden

¶ Summa summarū die Clöster vnd pfarr zuhauff eyn Jar. xvij. million viermall hundert tausent. lxxvij. tausent vn. viij. hundert Ungerisch

¶ Item/Sonder stowr vn hilff der Grofmächtigen Fürste (gulden vnd Herren/vnd aller frummer lewt/beyde geystlich vnd weltlich/man vnd frawen person/was stowr man darzu geb/eyn yeder vber seyn wochen gelt/das ist nicht zurechnen.

¶ Auch soll man der Juden nit vergessen/Soll man anschlahen nach frummer herren rat/brecht eyn gutte stowr.

¶ Item/nun hab ich gerechent/wie vil man Söldner zu Ross vnd zu fuß möcht haben von dem wochen pfenning / als dan vor bezaychent ist sonder on ander stowr vn hilff/Wen man ein zu Ross geb ein woch zwen Ungerisch gulden/ vnd eyn zu fuß eyn Ungerischen gulden/ oder x. schilling pfenning. So möcht man halten zu Ross hundert tausent. xxiiij. tausent vnd achthundert Söldner. ¶ Item zu fuß auch hundert tausent vnd. xxiiij. tausent vnd acht hundert Söldner.

¶ Summa summarū zu Ross vnd fuß zway mall hundert tausent. xlvij. tausent vnd sechzehen hundert Söldner.

¶ Item/So möcht eyn yezlicher Fürst vnd herr geystlich vnd weltlich/vnd meniglich in seynem standt/vnd in seynem rwe vnd wesen beleyben/aufgenummen die zu Hautbleuten vnd Söldnern auffgenummen vnd bestellt werden/eynem yeden seynen solt zu geben.

¶ Item/Sol man aber auß der gemein schicken ein volck an die Türcken von Handwerckfleuten/ von geystlichen vnd weltlichen/ Gedeche eyn yeder hinder sich an sein geschafft/auch an weyb vnd an kinder/Vn weren des harten legers zu veld nit gewont/offt hunger/durst/ vnd kelt leyden/das der Söldner muß dulden/dan er weyß wol das er seyn sold



darumb ein nimbt. Vnd zumermeyden die vneyngkeyt die vnter dem gemeynen man ist/Dan eyne yeder Söldner muß seynem Rotmeyster vnderthenig vnd gehorsam seyn.

¶ Item so man sochen anschlag thut/so soll eyne yeder haushwirt oder haushwirtin bey iren ayden / bey dem schweren pann / si sindt geystlich oder weltlich / Edel oder vnedel / niemant außgenummen / Pfarrer oder püster zc. yeder seynem dienstpoten / der zu dem heyligen sacrament geet sein wochen pfenning dar geben / vnd sol es im an seinem sold oder Jarlon abziehen / vnd sol auch solch gelt geben vnd raychen an die ende / da man dann eyne yeden hin bescheyden hat zc. Bey der peen vnd büß die man darauff gesetzt hat.

¶ Item / zu solchem anschlag der Türcken gehört eynigkeyt der Fürste des reichs / auch eyntrechtliche münz von golt vnd von silber / das der Vngerisch vnd der Keinisch gulden mit eynander cöcordiren / Also / das funff Keinisch gulde als gut sein als vier vngerisch oder ducaten gulde

¶ Item / Auch dabey eyne silberin münz, als groschen vñ Creützer / vñ zwayer / vñ pfenning / das dan dienet in alle landt / das eyne yeder möcht wandern on vorlust der münz.

¶ Item / So müssen die Vngerischen vnd Ducaten gulden auff das mynst halten. xxiiij. Karat / Etlich halten mehr / etlich mynder / Sollen achzig auff eyne Wiener marcß geen.

¶ Item / So sollen die Keinischen halten. xix. Karat / vnd sollen. lxxxvi. auff eyne Wiener marcß geen.

¶ Item So müste der Grosch halten neun lot feyns silbers / vnd müsten hundert auff eyne Wiener marcß geen.

¶ Item / oder der Grosch müst halten. viij. lot feyns silbers / vnd .xci. auff eyne Wiener marcß geen / so wurdter destter besser / so wer dan eyne grosch als schwer als drey Creützer.

¶ Item / So sollen die Creutzer halten eyne marcß .viij. lot feins Silbers / vnd sollen. xvij. auff eyne lot geen / so wegen drey Creutzer ein groschen / vnd das soll Wiener gewicht sein.

¶ Item / dye zwayer sollen haben eyne marcß .vi. lot feins silbers Wiener gewicht / vnd sollen. xxvi. auff eyne lot geen.

¶ Item / dye pfenninge sollen habē eyne marcß .iiij. lot feins silbers Wiener gewicht / vnd sollen. xxxvi. auff eyne lot geen

¶ Item / so wers. xxv. groschen fur. j. Vngerischen oder Ducaten gulde



¶ Item. xx. Groschen für eyn Keinischen gulden/wer. v. für. iij. Unge-  
risch gulden/oder. iij. Ungerisch für. v. Keinisch gulden.

¶ Item/der grosch sol halten zwelff pfenning/oder sechs zwayer.

¶ Item/der Creutzer sol gelten vier pfenning oder zwen zwayer.

¶ Item wer gleych drey Creutzer für eyn groschen/ Auch wer es gleych  
lxv. Creutzer für eyn Ungerischen oder Ducaten gulden vn. lx. Creutzer  
für eyn Keinischen gulden/ Wer in Osterreich/ Bayern/ Steyrmarch  
Bernten/ Kren. x. schilling pfenning für eyn Ungerischen oder Ducaten  
gulden/ Auch wer es für ein Keinischen gulden. viij. schilling pfenning/  
oder vier schilling zwayer für eyn Keinischen gulden.

¶ Item/ So möcht man den groschen/ als weyt das heylig Römisch  
reych ist/ eyn gemeinen namen setzen vnd hayssen/ nach dem der kauff-  
man dan mit mancherley groschen im heyligen reych kaufft vnd ver-  
kaufft/ möcht man den groschen nennen schilling in golt. xxv. schilling  
in golt für eyn Ungerischen oder Ducaten gulden/ Vnd. xx. schilling yn  
golt für eyn Keinischen gulden/ eyn schilling in golt für. xij. haller oder  
pfenning wie man sie nennen wölt.

¶ Item/ So wurde solliches gelt geen als weyt alle Teitsche vn wels-  
sche landt seind im heyligen reych vnd alle Fürstenthumb.

¶ Item/ auch wer solche vorgeschribne silbern müntz/ groschen/ Creu-  
zer zwayer/ vnd pfenning/ yezlichs nach seiner wirt des gulden werd.  
Es sindt Ungerisch/ Ducaten/ oder Keinisch gulden/ des gleychen wi-  
derumb die gulden des gelts werd in allen Fürstenthumen.

¶ Item/ wen solcher anschlag geschech vnd eyn gemeynen furgang ge-  
wunne durch die heyligen christenheyt/ als weyt der christenlich glaub  
raycht/ wiewol etlich wurden sprechen es trüg ein merckliche sum gelts  
darmit die christenheyt geschwecht oder beschwerdt wurde / so wer es  
doch eynem yeden armen vnd reychen/ geystlich vnd weltlich wol zu ley-  
den vnd zu dulden.

¶ Item/ nun setz ich das solch gelt wurd wider in die gemeynschafft  
der christenheyt kummen vnd gebracht werden/ vnd die christenheyt  
vnd der christenlich glaub damit gesterckt wurd.

¶ Item/ wen dan eyn gemeynen fryd der christenheyt ist/ so werden da-  
durch aller Fürsten meret vnd Zöl gemert vnd gebessert in allen landern  
mit aller handthierung ab vnd zu führen.

¶ Item/ auch werden die wirt oder gastgeben gebessert mit der zerung



auch der parwrsman/der fleyschawer/der wischer/vnnd der peck/vnnd  
der weinschenck/ vnd das vmbgelt der Fürsten vnd der Stet/ vnd vill  
ander die durch die gest vnd von den wirtten yr narung haben möchte  
¶ Item auch wurden all handtwercker vnd Kauflewt dadurch ge-  
bessert/ als der schuster/ schneyder/ wollenweber/ leynweber/ schmidt/  
platner/vnd bogner/schwertfeger/messerschmidt/ rotschmidt/büchsen  
mayster tc. vnd vil ander die dan nachuolgend ab vnnd tzu führen/von  
allen landen yr narung suchen.

¶ Item/ das sollich gelt alles wider hinder sich tritt in die gemeyn der  
christenheyt/was dann von gelt vnnd von gut den Türcken abgewun-  
nen wirdt/ geet alles der Christenheyt wider heym/ das eyn yeder feins  
wochen pfennings wol wider eyn mag kummen vnd gewinnen/ Er sey  
Fürst oder herr/ edel oder vnedel/ geystlich oder weltlich/ hantwercker  
oder parwr/niemant außgenommen.

¶ Item/Also den mag eyn landt dem andern dienen mit aller handts-  
thierig/eyns hat tuch/eyns hat parchat/eyns leynwat/eyns eyssen/eyns  
stahel/eyns Golt/eins silber/eyns kupffer/eyns saltz/eyns gewürz/eyns  
wein/der treybt Ochsen Ross vnnd ander viech/dauon vil zuschreyben  
wer/das allweg von eyn landt zu dem andern gefurt wirdt.

¶ Item/Damit mag die heylig Christenheyt wider zu nemen/ Das sie  
wol on schaden vnd mit gutem rat/got dem almechtigen zu lob vnd zu-  
eren solche wütrich/die dan wider den heyligen christlichen glaubē sind  
widerstandt thun mit grossen eren/on schaden meniglichs.

¶ Item/durch solichs möchten alle landt wider auffnemen/in geyst-  
lichen vnd weltlichen stenden/ die dan der Türck verwüst vnd zerstört  
hat/vnnd zu dem christlichen glauben bracht werden/got dem herrn zu  
lob vnnd eren. Vnd ich hoff zu dem almechtigen got/der almechtig ist/  
seyn götlich gnad darzu geb/ das wir christen die Türckischen landt zu  
dem heyligen christlichen glaubē mögen bringen/ Als es der Türck gern-  
thet vnd sehe vnd darnach strebt/alle christen menschen/an leyb vnd an  
gut zu verderben vnd vnter seyn gewalt zubringen mit seynem vnglau-  
ben/mir zweyfelt nit got der herr sol vns christen seyner götlichen gnad  
sig vnd vberwindung geben gegen den vngläubigen.

¶ Item/wen von tausent menschen würdē geben eyn ganz Jar.x. gul-  
den tzu steuer vber den wochen pfenning/ das brechte das Jar in eynen  
sum zway mall hundert tausent. xxxij. tausent vñ zway hundert gulde.



¶ Item/ wen aber eyn yede Pfarckirchen/eyne der andern tzu hiff wöle  
geben vber den wochen pfening; alle Jar. v. gulden/ So brecht es eyn  
Jar in eyner sum. xvij. mall hundert tausent gulden.


¶ Item/ wē auch ein yeder Fürst vñ Keychstat nür eyn gutte püchsen  
oder schlangenpüchsen zu solchem anschlag tzu steur gebe/ nach yedes  
herren vermügen/ das doch yedem one schaden möcht seyn / das recht  
man auß wie vil püchsen auff den Türcken zug möchten bracht wer-  
den/ on schaden der christenheyt vnd des gemeynen mans.

¶ Item/ wen man solchen zug wölt thun/ so ließ man solch volck dan  
in funff rayl taylen/ das wer in yedes tayl. l. tausent man/ vnd müsten nit  
also auff die Türcken raysen als sie auff vns / Tür an yedem endt fur-  
genummen. x. oder. xv. meyl lang/ was landt sie zerstört oder vntersich ge-  
bracht hetten/ solchs wider in vnser landt zubringen/ vnd die zubesetzen  
vnd zu bewaren mit christen leuten/ Vnnd dan aber so vil furgenummen  
wie vor. Wen dan der Türck solchen zug weren wölt/ so müst er zu den  
christen ziehen/ vñ sie dabeyn suchen/ So möchten sich die christen als-  
dan bestercken/ von eynem endt zu dem andern/ vñnd hetten also eynen  
grossen vorteyl/ das er sie in yrer w. s. suchen müst/ vnd sie in nit. Bege-  
ret aber der Türck eynen streyt mit den christen / so hetten wir die gan-  
zen christenheyt hinter vns. Da möcht ein yeder frummer chüst vnsern  
leuten zu trost künien. Vnnd wer die christenlich Ritterschafft haben  
wölt/ der möchte sie da suchen mit seynem Creutz. Auch so hetten wir  
christen alsdan eynen grossen vorteyl/ Das der Türck vns heym suchen  
müst zu solchem streyt/ vnd wir in nit. Mit solchem absuchenden krieg  
wurd man dem Türcken alle die/ die in dem Christen glauben weren ge-  
ben widerumb abtringen. Vnnd dan yn mit solchem zwang/ so es ge-  
schehe/ das er sich vnterthenig möcht machen dem almechtigen Got/  
vñnd der heyligen christenheyt/ dan mit solchem anschlag vñnd wider-  
standt möcht mans bringē on der christenheyt schad/ war zu mans ha-  
ben wölt. Aber wen man sie wölich vberziehen der maß als sie vns/ so  
möcht man mercklich groß schadē nemen. Darumb mit sollichem senff-  
ten wesen vnd ordnung/ hoffet ich zu got/ wir wölt in kurzen Jaren  
das heylig grab vñ die Türcken hundt vnter vns bringen/ Auch wurd  
vns got vmb christlichs glaubens willen sig verleyhen. Amen.



*[The text on this page is extremely faint and illegible due to fading and bleed-through from the reverse side. It appears to be a dense block of text, possibly a letter or a page from a manuscript.]*







202, 207, R-Sonder M.

55-16.2h.



R 97/126







